


**CONVENIO DE COLABORACIÓN ENTRE A CONSELLERÍA DE SANIDADE,
O SERVIZO GALEGO DE SAÚDE E A UNIVERSIDADE DE SANTIAGO DE
COMPOSTELA PARA A CONSTITUCIÓN DO INSTITUTO DE
INVESTIGACIÓN SANITARIA DE SANTIAGO DE COMPOSTELA.**

En Santiago de Compostela, a 31 de xaneiro de 2008

REUNIDOS

Dunha parte, a Sra. Dña. M.ª José Rubio Vidal, Conselleira de Sanidade e Presidenta do Servizo Galego de Saúde, de acordo co establecido no artigo 34 da Lei 1/1983, de 22 de febreiro, reguladora da Xunta e do seu presidente, modificada pola Lei 11/1998, de 20 de outubro, e de conformidade cos Decretos 45/2006 e 46/2006, do 23 de febreiro, polos que se establecen as estruturas orgánicas da Consellería de Sanidade e do Servizo Galego de Saúde, así como na Lei 30/1992, do 26 de novembro, de réxime xurídico das administracións públicas e do procedemento administrativo común, e de conformidade co establecido no acordo da Xunta de 27 de marzo de 1991, feito público mediante resolución do 8 de abril de 1994, da Consellería de Economía e Facenda (D.O.G. n.º 82, do 30.04.1991)

E doutra, o Excmo. Sr. D. Senén Barro Ameneiro, reitor da Universidade de Santiago de Compostela, con CIF Q1518001A, e domicilio na Praza do Obradoiro, s/n, 15705 Santiago de Compostela, actuando en nome e representación da mesma, en virtude das facultades que lle confire a Lei Orgánica 6/2001 da Universidade do 21 de decembro e do Decreto 28/2004, do 22 de xaneiro polo que se aproban os Estatutos da Universidade de Santiago de Compostela.




Ambas partes, actuando na representación que ostentan, recoñécense mutua e reciprocamente a capacidade legal necesaria para formalizar o presente Convenio de colaboración e a tal efecto

MANIFESTAN

PRIMEIRO.- Que corresponde á Comunidade Autónoma de Galicia, promover a investigación en virtude das competencias que en dita materia lle confire o artigo 27.19 do seu Estatuto de Autonomía.

Así mesmo, a Lei 7/2003, de 9 de decembro, de Ordenación Sanitaria de Galicia, no seu título X, capítulo II, determina que as actividades de



investigación fomentaranse no sistema sanitario de Galicia, como elemento fundamental para o seu progreso e que, para tal fin, a Consellería de Sanidade participará nas políticas e no establecemento de prioridades de investigación no eido da saúde.


Por outra banda, as normas de estrutura orgánica da Consellería de Sanidade e do Servizo Galego de Saúde fan referencia á importancia da docencia e investigación sanitarias no ámbito da Comunidade Autónoma, asignando as correspondentes funcións aos seus órganos e unidades.

SEGUNDO.- Que a Universidade de Santiago de Compostela é unha entidade pública de investigación de carácter multisectorial e pluridisciplinario que desenvolve actividades de formación, investigación e desenvolvemento científico e tecnolóxico en numerosos campos e, en particular, en Ciencias Biomédicas.

Que os estatutos da Universidade de Santiago de Compostela aprobados por Decreto 28/2004, de 22 de xaneiro, sinalan no seu artigo 4 entre outras funcións da Universidade, a difusión, a valorización e a transferencia do coñecemento ao servizo da cultura, da calidade de vida e do desenvolvemento económico e social; a difusión do coñecemento e a cultura a través da extensión universitaria e a formación ao longo de toda a vida e o apoio científico e técnico ao desenvolvemento social, económico e cultural da sociedade galega que a sustenta.

TERCEIRO.- Que con data 20 de abril de 2001 subscribiuse un concerto para a colaboración en docencia e investigación e asistencia sanitaria entre a Universidade de Santiago de Compostela e o Servizo Galego de Saúde. Neste Concerto sinálanse como obxectivos de investigación os seguintes:

1. Potenciar a investigación en Ciencias da Saúde, coordinando as actividades da Universidade de Santiago de Compostela coas institucións sanitarias para unha mellor utilización dos recursos humanos e materiais.
2. Favorecer o desenvolvemento dos departamentos universitarios nas áreas de saúde potenciando a súa coordinación coas unidades de investigación dos hospitais e demais institucións sanitarias, estimulando as súas vocacións investigadoras



CUARTO.- Que o Real Decreto 339/2004, de 27 de febreiro, sobre acreditación de Institutos de Investigación Sanitaria (BOE de 13 de marzo de 2004) ten por obxecto a regulación do procedemento para a acreditación de Institutos de Investigación Sanitaria no ámbito do Sistema Nacional de Saúde, de acordo co disposto polo artigo 50 da Lei 16/2003, do 28 de maio, de cohesión e calidade do Sistema Nacional de Saúde que establece "promoverase a configuración de

institutos de investigación sanitaria mediante a asociación de centros de investigación, que serán acreditados polo Ministerio de Sanidade e Consumo". Este Real Decreto ten por finalidade, segundo o establecido no seu artigo 2 punto 1, "fomentar a asociación aos hospitais do Sistema Nacional de Saúde, das Universidades, Organismos Públicos de Investigación e outros centros públicos ou privados de investigación, aos efectos de constituír Institutos de Investigación multidisciplinares e multiinstitucionais que contribúan a fundamentar cientificamente os programas e políticas do Sistema Nacional de Saúde, potenciando preferentemente a investigación traslacional. Os hospitais constitúen o núcleo básico dos Institutos de Investigación Sanitaria resultantes de dita Asociación".

Que a Lei Orgánica 4/2007, de 12 de abril, pola que se modifica a Lei Orgánica 6/2001, de 21 de decembro, de Universidades, sinala que as universidades, conxuntamente cos organismos públicos de investigación, cos centros do Sistema Nacional de Saúde e con outros centros de investigación públicos ou privados sen ánimo de lucro, promovidos e participados por unha administración pública, poderán constituír Institutos Mixtos de Investigación.

QUINTO.- Que na reunión celebrada o 26 de xullo de 2005 da Comisión Mixta do Concerto entre a Universidade de Santiago de Compostela e o Servizo Galego de Saúde, publicado por Orde de 18 de xuño de 2001 da Consellería de Sanidade e Servizos Sociais, incluíuse como punto da orde do día a proposta de constitución e posta en marcha dun Instituto de Investigación Sanitaria dos sinalados no Real Decreto 339/2004, de 27 de febreiro. Dito punto debateuse favorablemente presentándose un documento como borrador de marco xurídico que se anexou á acta da reunión. En dito anexo propónse constituír un Instituto de Investigación Sanitaria mediante a asociación ao Complexo Hospitalario Universitario de Santiago de Compostela da Universidade de Santiago no marco do Real Decreto 339/2004, a través dun convenio de colaboración.

Que as partes, no exercicio das súas respectivas facultades e entendendo beneficioso para todas elas a colaboración nas materias da súa competencia, acordaron subscribir o presente Convenio de Colaboración, que levan a efecto con suxeición ás seguintes:

CLAUSULAS

1.-OBXECTO DO CONVENIO

1. Mediante este Convenio as partes acordan a constitución dun instituto de investigación sanitaria a través da asociación das unidades de investigación da Universidade de Santiago de Compostela e do Complexo Hospitalario Universitario de Santiago de Compostela, de conformidade co previsto no Real

Decreto 339/2004, de 27 de febreiro, sobre acreditación de Institutos de Investigación Sanitaria.

2. E obxectivo das partes asinantes e do propio IISSC, conquistar a acreditación prevista no Real Decreto 339/2004, na que o Complexo Hospitalario Universitario de Santiago de Compostela constituirá o núcleo básico do Instituto de Investigación Sanitaria de acordo o previsto no ao artigo 2 punto 1 de dita disposición.

2.- SEDE.-

O IISSC terá a súa sede en Santiago de Compostela .

3.- MEMBROS.-

1.- O Instituto estará constituído pola Consellería de Sanidade e a Universidade de Santiago.

2.- Sen prexuízo do anterior, establécese a posibilidade de inclusión de novos integrantes, coa finalidade de incorporar novos grupos de investigación que potencien os obxectivos do instituto.

A incorporación de novos membros realizarase previa solicitude dos mesmos, e aceptación das condicións de admisión que, no seu caso, estableza o IISSC. A incorporación terá efecto unha vez exista acordo expreso do IISSC, e se acepten expresamente as súas condicións.

3.- Os membros do IISSC comprométense a manter a súa participación no mesmo, con pleno cumprimento dos seus dereitos e obrigas, debendo, no seu caso, manifestar expresamente a súa renuncia cunha antelación mínima de 6 meses.

Neste caso, os órganos de decisión do IISSC determinarán a forma de cumprir os compromisos pendentes, e as condicións en que deba realizarse.

4.- FUNCÍONS DO IISSC.-

O IISSC levará a cabo actividades de investigación nas liñas por el priorizadas, sendo referente a investigación do Complexo Hospitalario Universitario de Santiago de Compostela, a da Universidade de Santiago de Compostela e as súas áreas de influencia e terá como funcións as seguintes:

1.- Fomentar a colaboración entre investigadores de ámbito básico, clínico, de saúde pública e de servizos de saúde.

2.- Promover a investigación traslacional e a innovación, que teñan aplicacións e repercusión clínicas.

3.- Fomentar a colaboración entre os centros de investigación do IISSC e outros pertencentes a outras institucións de investigación no ámbito autonómico, estatal ou supraestatal.

4.- Favorecer e desenvolver programas e proxectos de investigación ou de formación de investigadores, prestando especial atención á formación científica de profesionais sanitarios.

5.- Fomentar o incremento da "masa crítica" a nivel local, as sinerxias e o uso eficiente das infraestruturas dispoñibles.

6.- Fomentar a participación de grupos de investigación en estruturas de investigación en rede.

7.- Fomentar a difusión dos resultados da investigación, así como a captación de recursos financeiros, públicos ou privados, para o mantemento da súa actividade.

5.- XESTIÓN DE SERVIZOS E DA INVESTIGACIÓN

1.- Para mellor desenvolvemento do seu obxecto e finalidades, o IISSC poderá solicitar ás entidades asinantes deste convenio que concerten con entidades públicas ou privadas, corporacións, ou particulares, os programas e actuacións adecuadas para o desenvolvemento e consecución dos seus obxectivos, utilizando as formas e técnicas de cooperación, asociación, contratos-programa ou xestión de servizos, que se mostren máis eficaces para a satisfacción dos intereses que ten encomendados ao Instituto.

2.- Inicialmente e mediante acordos específicos para tal fin, as partes asinantes deste convenio, poderán establecer que a Fundación para a investigación desenvolvemento e innovación do Complexo Hospitalario Universitario de Santiago de Compostela (IDICHUS) e o Vicerreitorado de Investigación e Innovación da USC, a través do seu Centro de Innovación e Transferencia de Tecnoloxía (CITT), sexan as estruturas encargadas da xestión da investigación realizada polo persoal do Instituto. Ambas estruturas ofrecerán o soporte necesario nas áreas económico-administrativas e de recursos humanos e actuarán como entes promotores da investigación e de transferencia dos resultados derivados da mesma. Independentemente da institución que leve a cabo a xestión, a devandita actividade deberá ser comunicada á outra institución.

Así mesmo, os ingresos que, en forma de custos indirectos, sexan xerados polas actividades de investigación repercutirán nas institucións implicadas na xestión dos proxectos en contía proporcional a súa participación.

6.- COMISIÓN MIXTA DE SEGUIMIENTO E CUMPRIMENTO DO CONVENIO.-

6.1.- Denominación.-

Para os efectos do presente convenio, a Comisión de Seguimento e Cumprimento do Convenio pasará a denominarse Consello Reitor, que se constitúe ao abeiro do preceptuado no artigo 6.3 da Lei 30/1992, do 26 de novembro, de réxime xurídico das administracións públicas e do procedemento administrativo común, co obxecto de profundizar e desenvolver o presente convenio, así como interpretar as dúbidas ou discrepancias que puidesen formularse ao longo da súa vixencia.

6.2.- Sen prexuízo de que se cre, no seu caso, o instituto e se dote da estrutura organizativa axeitada, será a comisión mixta o órgano colexiado que durante a vixencia do convenio e baixo a denominación de Consello Reitor, asuma as funcións de dirección e representación aos efectos establecidos no artigo 3.b do RD 339/2004. A composición deste Consello será a seguinte:

- a) Presidente/a: o/a titular da Consellería de Sanidade, ou o/a director/a da Dirección xeral de Aseguramento e Planificación Sanitaria.
- b) Vicepresidente/a: o/a reitor/a da Universidade de Santiago de Compostela, ou o/a vicerreitor/a de investigación e innovación.
- c) 6 Vogais, tres designados pola Conselleira de Sanidade e outros tres polo Reitor da USC.
- d) O/A director/a científico/a, que terá voz pero non voto nas sesións do Consello Reitor.
- e) O Secretario/a, de acordo co establecido na cláusula 6.6.

6.3.- Son funcións do Consello Reitor as seguintes:

- a) Fixar o domicilio da sede do instituto
- b) Establecer os criterios necesarios para o cumprimento dos fins do IISSC.
- c) Adoptar as medidas precisas para o mellor cumprimento dos fins determinados no presente convenio.
- d) Resolver sobre a incorporación de novos membros ou a saída dos existentes.
- e) Propoñer o Plan estratéxico e de calidade do IISSC, de acordo aos requirimentos previstos na normativa aplicable en materia de acreditación de institutos de investigación sanitaria.
- f) Propoñer ás entidades conveniadas a distribución dos fondos que se lle atribúan en función da súa actividade
- g) Aprobar os plans de actuación e formación, e avaliar os seus resultados.
- h) Aprobar a Memoria Anual.
- i) Facultar a un membro para a acreditación do instituto
- j) Aprobar as medidas propostas polo Comité Científico Externo, e avaliar os seus resultados.

O Consello Reitor constituirase nun prazo non superior a un mes contado a partir da data de sinatura do presente convenio. Na súa primeira reunión necesariamente designará ao Director Científico.

6.4. Corresponderalle á/ao presidenta/e do Consello Reitor o exercicio das seguintes funcións:

- a).- Convocar, fixar a orde do día, presidir e moderar as sesións do Consello Reitor, dispoñendo de voto dirimente en caso de empate. Tamén poderá presidir as sesións doutros órganos colexiados que puideran crearse en función das necesidades de xestión.
- b).- Velar polo exacto cumprimento deste Convenio, dos acordos adoptados e, en xeral, das normas legais aplicables en cada caso.
- c).- Autorizar, co seu visto e praxe, as actas das sesións do Consello Reitor.

6.5.- O Vicepresidente/a substituirá á/ao Presidente/a nos casos de vacante, ausencia ou enfermidade deste/a.

Tamén asumirá as funcións que lle sexan singularmente encomendadas pola Presidencia ou polo Consello Reitor.

6.6.- A secretaría do Instituto será exercida por un dos membros do Consello Reitor ou no seu caso por un funcionario designado para estes efectos. Neste caso actuará con voz pero sen voto. Dará fe dos acordos adoptados e será o custodio da documentación administrativa.

6.7 .- O Consello Reitor someterá a súa actuación, no non previsto neste Convenio, ás normas administrativas e de funcionamento dos órganos colexiados.

7.- ORGANIZACIÓN CIENTÍFICA.

7.1.- O IISSC canalizará e levará a cabo a actividade investigadora nas áreas temáticas de maior impacto sanitario para a poboación de referencia do Complexo Hospitalario Universitario de Santiago de Compostela, así como nas de maior oferta científica polos grupos e centros de investigación da USC, tanto na área biomédica coma naquelas que supoñen unha oportunidade estratéxica, por ser unha prioridade dos seus membros, no relativo a problemas de saúde ou áreas transversais ou liñas emerxentes, de acordo cos seus fins.

7.2.- O IISSC ten o propósito de actuar sobre as seguintes liñas de investigación:

a.- Problemas de saúde:

- a).- Enfermidades neurolóxicas.
- b).- Cancro.
- c).- Enfermidades músculo-esqueléticas e do aparato locomotor.

- d).- Enfermidades endocrinas, nutricionais e metabólicas.
- e).- Enfermidades cardiovasculares.
- f).- Enfermidades infecciosas.

b.- Áreas transversais:

- a).- Inflamación.
- b).- Xenética e bioloxía de sistemas.
- c).- Epidemioloxía, Saúde Pública e Servizos de Saúde. Atención Primaria.
- d).- Farmacoloxía.

Estas liñas de investigación serán revisadas periodicamente a través do Comité Científico Externo, e ratificadas ou modificadas por acordo do Consello Reitor.

Unha vez constituídas, cada liña de investigación disporá dun coordinador, responsable do seu desenvolvemento, a proposta do/a director/a científico/a co asesoramento do Comité Científico Externo.

7.3.-- O Consello Reitor, por proposta da Presidencia, designará a un/unha director/a científico/a, para o exercicio das seguintes funcións:

- a).- Propoñer ao Consello Reitor o Plan estratéxico e de calidade, así como os plans anuais de actuación, e velar pola súa execución.
- b).- Dirixir e xestionar a actividade científica do Instituto
- c).- Propoñer ao Consello Reitor o nomeamento e cese dos coordinadores de liña, nos que poderá delegar o exercicio de funcións relativas ao seu cargo.
- d).- Propoñer ao Consello Reitor un programa de avaliación da investigación realizada, co asesoramento do Comité Científico Externo.
- e).- Propoñer ao Consello Reitor un programa de tutela de grupos emerxentes de investigación.
- f).- Informar anualmente ao Consello Reitor, segundo lle sexa solicitado, dos resultados das actividades científicas realizadas, elaborando unha memoria e informe científico, que se incorporará á Memoria Anual do IISSC.
- g).- Exercer aquelas funcións que, no seu ámbito, lle sexan singularmente encomendadas polo Consello Reitor, ou pola Presidencia.

7.4.- Designarase un Comité Científico Externo, que terá por obxecto velar pola calidade científica das actividades realizadas polo IISSC, e contribuír á súa mellora. Estará integrado por un mínimo de catro membros e un máximo de oito, designados e cesados polo Consello Reitor, entre investigadores de recoñecido prestixio e/ou xestores de investigación de alta cualificación, con experiencia contrastada na xestión de grandes centros ou programas de investigación, e que desenvolvan a súa actividade científica fóra de Galicia. Serán funcións do Comité Científico Externo as seguintes:

- a).- Avaliar a actividade científica realizada no IISSC.

b).- Formular as propostas que estimen convenientes para a adopción das medidas necesarias para a mellora da calidade da investigación.

c).- Asesorar ao Consello Reitor, e á Dirección Científica, naqueles temas que requiran coñecemento especializado.

7.5.- O Instituto disporá dunha Comisión de Investigación que deberá coincidir coa Comisión de Investigación do Concerto entre a USC e o Servizo Galego de Saúde. Esta Comisión actuará como asesora da Dirección Científica, nos temas que requira, e será a encargada de emitir os informes necesarios para as convocatorias de proxectos, cando participen investigadores do IISSC.

7.6.- O IISSC agrupará e organizará a súa actividade encol dos grupos de investigación pertencentes ás estruturas das entidades asinantes deste convenio, ou outros que se incorporen con posterioridade, de conformidade co previsto neste acordo. Cada grupo de investigación terá un "investigador xefe de grupo", que desenvolverá a súa actividade científica no instituto, e deberá ser persoal do Complexo Hospitalario de Santiago de Compostela (incluídos os investigadores de carreira adscritos ás unidades asistenciais), ou profesores da Universidade de Santiago de Compostela (con ou sen praza vinculada).

8.- FORMACIÓN

O IISSC poderá participar nas actividades formativas das entidades asinantes. Tamén poderá realizar un específico Plan de formación, aprobado polo Consello Reitor, que poderá estruturarse en distintos niveis de formación, e abranguerá a participación do persoal propio tanto na formación específica como na de Grado, Posgrao e Doutoramento. As actividades de formación terán en conta aos profesionais residentes, e ao persoal sanitario e tamén ao persoal en formación e bolseiro.

As áreas temáticas do Plan específico de Formación versarán sobre as diferentes metodoloxías de investigación experimental, clínica e epidemiolóxica, no marco das liñas estratéxicas priorizadas, potenciando a investigación traslacional.

O Plan de formación conterá necesariamente mecanismos de avaliación das actividades formativas que se leven a cabo, para os efectos da súa inclusión na Memoria Anual do IISSC.

9. PATENTES E PROPIEDAD DOS RESULTADOS

Se as actividades de investigación desenvolvidas no Instituto por parte de investigadores integrados no mesmo desen lugar a resultados susceptibles de ser considerados como propiedade industrial, a súa explotación corresponderá ás partes asinantes. O reparto dos dereitos de explotación entre institucións

será proporcional ao número de inventores afiliados a cada institución e á importancia da contribución de cada un deles á invención, segundo en cada caso si determine.

No caso que as actividades de investigación establezan que parte dos devanditos dereitos corresponden á entidade financiadora, a condición anterior só aplicárase para a parte deses dereitos que segundo o acordo pertencan ás institucións.

Os trámites de rexistro da patente serán realizados por cada unha das partes que conforman o IISSC a través dos órganos de xestión que correspondan, conforme á Cláusula 5.2 deste Convenio, dependendo da pertenza dos inventores, sendo, en calquera caso, comunicado á outra parte con suficiente antelación para que sexa posible valorar por ambas partes a súa tramitación. Os gastos derivados do rexistro e mantemento serán sufragados por cada institución en forma porcentual aos dereitos que lle correspondan.

Os dereitos de propiedade intelectual pertencerán aos seus autores, agás o que se estableza outros dereitos na asignación de fondos públicos.

10. ORZAMENTO E PARTICIPACIÓN EN INVESTIMENTOS E GASTOS DE FUNCIONAMENTO

1. Con respecto aos investimentos, a Consellería de Sanidade e a Universidade de Santiago de Compostela poñerán a disposición do cumprimento dos obxectivos deste convenio os espazos e infraestruturas necesarias. Os espazos de traballo cumprirán coas normas de seguridade que marca a lexislación vixente.
2. Os entes conveniados poñerán a disposición dos investigadores as infraestruturas necesarias para a súa utilización nos obxectivos de investigación do instituto. A titularidade das infraestruturas permanecerá nas institucións cedentes.
3. Os bens que se poñan a disposición dos investigadores do Instituto ao amparo deste convenio reflectiranse nun inventario subscrito por ambas partes, ben sexa no momento da sinatura deste convenio ou nun momento posterior, sempre antes da posta a disposición efectiva dos mesmos.
4. O Consello Reitor, a iniciativa do Director Científico, propondrá ás entidades conveniadas a aprobación dos gastos de funcionamento que se dediquen aos obxectivos deste convenio. Na medida que este financiamento se obteña a través de actividades científicas financiadas polas distintas axencias públicas ou privadas, parte deste financiamento

poderá destinarse a aportar recursos en especie que garantan o funcionamento do Instituto.

11. VIXENCIA E RESOLUCIÓN DO CONVENIO

O presente Convenio terá carácter indefinido e entrará en vigor o día da súa sinatura.

Será causa de resolución do presente Convenio:


- O acordo expreso e por escrito das institucións asinantes
- O incumprimento das obrigas que a cada parte corresponden, previa reunión do Consello Reitor.

12. NATUREZA E SEGUIMENTO DO CONVENIO

O presente Convenio ten natureza administrativa. As cuestións litixiosas que puidesen xurdir na súa interpretación e cumprimento, e que non sexan resoltas no órgano de seguimento, serán de coñecemento e competencia da Orde Xurisdiccional Contencioso-Administrativa.

E para que conste, en proba de conformidade, asínase o presente convenio de colaboración en catro exemplares, en cada unha das súas follas, no lugar e a data anteriormente citadas.

**POLA UNIVERSIDADE
SANTIAGO DE COMPOSTELA**



Asdo.: Senén Barro Ameneiro

**DE POLA CONSELLERÍA DE SANIDAD
E O SERVIZO GALEGO DE SAÚDE**



Asdo.: María José Rubio Vidal.